



SEBUAH parit yang dikorek oleh penduduk bagi menghalang air daripada melimpah ke rumah mereka semasa hujan lebat di Kampung Sungai Balak, Kajang, Selangor.



PENDUDUK mendakwa kegiatan mengorek pasir di kawasan sungai memburukkan lagi masalah banjir lumpur.

50 rumah di Kampung Sungai Balak jadi mangsa

Penduduk sengsara dilanda banjir

Oleh MOHD. FAUZI SUHAIMI

kota@utusangroup.com.my

■ KAJANG 18 NOV.

PENDUDUK di hampir 50 buah rumah di Kampung Sungai Balak, Batu 13 di Jalan Cheras, Kajang dekat sini sengsara ekoran banjir lumpur yang disebabkan saluran kunci air yang rosak sejak setahun lalu.

Setiap kali hujan lebat penduduk dilanda kebimbangan dan terpaksa bersiap sedia berdepan kemungkinan banjir lumpur melanda kawasan kampung tersebut.

Seorang penduduk, **Yunus Mokhtar**, 63, mendakwa, aktiviti mengorek pasir di sungai berdekatan memburukkan lagi masalah tersebut.

"Masalah ini sudah berlanjutan

ISU RAKYAT



sejak setahun lalu. Kami sudah tidak berdaya untuk menanggung risiko air naik sekiranya hujan lebat.

"Aduan kepada pihak berwajib telah dibuat, namun masih tidak mendapat perhatian terutamanya dalam soal membaik pulih kunci air tersebut," katanya ketika ditemui *Utusan Malaysia* di sini hari ini.

Dalam pada itu, Yunus memberitahu, rumahnya antara yang terjejas teruk sekiranya berlaku limpahan air di Sungai Langat.

"Buat masa sekarang, kami mengambil tindakan membina penghalang air di saluran utama bagi mengelakkan banjir terus masuk ke

kawasan perumahan.

"Bagaimanapun, langkah itu tidak akan berkesan dalam mengatasi jumlah limpahan air sekiranya pengunci air di bahagian sungai tidak dibaiki sepenuhnya," jelasnya.

Sementara itu, salah seorang penduduk, **Jaffari Mohd. Tahir**, 45, berharap pihak berkuasa tempatan memantau aktiviti mengorek pasir yang dijalankan di sungai berkenaan.

"Tiada sebarang pengesahan seperti papan tanda diletakkan di kawasan itu berhubung kegiatan mengorek pasir. Mungkin sebelum ini mereka mendapat permit, tetapi sekarang kami tidak tahu statusnya.

"Kami harap pihak berkuasa melakukan pemeriksaan dan pemantauan agar kegiatan itu tidak memberi kesan buruk kepada penduduk," ujarnya.



JAFFARI MOHD. TAHIR (kanan) dan Yunus Mokhtar menunjukkan kawasan yang dinaiki banjir lumpur di Kampung Sungai Balak, Kajang, Selangor semalam.